

南無本師釋迦牟尼佛



妙法蓮華經卷第三

化城喻品第七

佛告諸比丘。乃往過去無量無邊不可思議阿僧祇劫。爾時有佛。名大通智勝。其國名好城。劫名大相。諸比丘。彼佛滅度已來。甚大久遠。譬如三千大千世界所有地種。假使有人磨以為微塵。過於東方千國土乃下一塵。又過千國土復下一塵。如是展轉盡地種塵。於汝等意云何。是諸國土。若算師。若算師弟子。能得邊際知其數不。不也。世尊。諸比丘。是人所經國土。若點不點。盡磨為塵。一塵一劫。彼佛滅度已來。復過是數無量無邊百千萬億阿僧祇劫。我以如來知見力故。觀彼久遠猶若今日。

佛告諸比丘。大通智勝佛。壽五百四十萬億那由他劫。其佛初坐道場破魔軍已。垂得阿耨多羅三藐三菩提。而諸佛法不現在前。如是一小劫。乃至十小劫。結跏趺坐。身心不動。而諸佛法猶不現前。忉利諸夫。先為菩薩於菩提樹下敷師子座。高一由旬。祝言菩薩於此座坐。當得阿耨多羅三藐三菩提。菩薩適坐此座。時諸梵天王雨衆天華。面百由旬。滿十小劫供養菩薩。乃至滅度。常雨此華。四王諸天為供養菩薩。

常擊天鼓。其餘諸天作天伎樂。滿十小劫。至於滅度。諸比丘。大通智勝菩薩過十小劫。諸佛之法乃現在前。得阿耨多羅三藐三菩提。便成佛道。比丘當知。其佛未出家時。有十六子。各有種種珍異玩好之具。聞父得成阿耨多羅三藐三菩提。皆捨所珍。往詣佛所。諸母涕泣而隨送之。其祖轉輪聖王。與一百大臣。及餘百千人民。皆共圍繞。隨至道場。親近供養恭敬。尊重讚歎。頭面禮足。繞佛畢已。十六兄弟一心合掌。瞻仰世尊。以偈頌曰。

大威德世尊	為度衆生故	於無量億歲	爾乃得成佛
諸願已具足	善哉德無上	世尊甚希有	一坐十小劫
身體及手足	靜然安不動	其心常擔怕	未曾有散亂
究竟常寂滅	安住無漏法	今者見世尊	自然成佛道
我等得善利	稱慶大歡喜	衆生常苦惱	盲冥無導師
不識苦盡道	不知求解脫	長夜增惡趣	減損諸天衆
從冥入於冥	由不聞佛名	今佛得最上	安隱無漏道
我等及天人	為得最大利	是故咸稽首	歸命無上尊

爾時十六王子偈讚佛已。勸請世尊轉於法輪。咸作是言。世尊說法。多所安隱。憐愍饒益諸天人民。

世雄無等倫 百福自莊嚴 得無上智慧 願為世間說
度脫於我等 及諸衆生類 為分別顯示 令得是智慧
若我等得佛 衆生亦復然 世尊知衆生 深心之所念
亦知所行道 又知智慧力 欲樂及修福 宿命所行業
世尊悉知己 當轉無上輪

佛告諸比丘。大通智勝佛得阿耨多羅三藐三菩提時。放大光明照於十方各五百萬億諸佛世界。令諸世界六種震動。其國中間幽冥之處。日月威光所不能照。亦皆大明。其中衆生。各得相見。咸作是言。此中云何忽現衆生。又其世界諸天宮殿乃至梵宮。六種震動。大光普照。徧滿世界。勝諸天光。爾時東方五百萬億諸國土中梵天宮殿。光明照曜。倍於常明。諸梵天王各作是念。今者宮殿光明。昔所未有。以何因緣。而現此相。是時諸梵天王。即各相詣。共議此事。時彼衆中有一大梵天王。名救一切。為諸梵王而說偈言。

我等諸宮殿 光明昔未有 此是何因緣 宜各共求之
為大德天生 為佛出世間 而此大光明 徧照於十方

爾時五百萬億國土諸梵天王。與宮殿俱。各以衣祴盛諸天華。共詣西方。推尋是相。見大通智勝如來。處於道場菩提樹下。

坐師子座。諸天。龍王。乾闥婆。緊那羅。摩睺羅伽。人非人等。恭敬圍繞。及見十六王子。即時諸梵天王。頭面禮佛。繞百千帛。即以天華而散佛上。其所散華。如須彌山。并以供養菩提樹。其菩提樹。高十由旬。華供養已。各以宮殿奉上。而作是言。唯見哀愍。饒益我等。所獻宮殿。願垂納處。時諸梵天王。即於佛前一心同聲。以偈頌曰。

世尊甚希有	難可得值遇	具無量功德	能救護一切
天人之大師	哀愍於世間	十方諸衆生	普皆蒙饒益
我等所從來	無量萬億國	捨深禪定樂	為供養佛故
我等先世福	宮殿甚嚴飾	今以奉世尊	唯願哀納受

諸梵天王偈讚佛已。各作是言。唯願世尊轉於法輪。度脫衆生。開涅槃道。時諸梵天王。一心同聲而說偈言。

世雄兩足尊 唯願演說法 以大慈悲力 度苦惱衆生
其餘九方諸梵天王亦復如是。

爾時大通智勝如來。受十方諸梵天王及十六王子請。即時三轉四諦十二行法輪。若沙門婆羅門。若天魔梵。及餘世間所不能轉。謂是苦。是苦集。是苦滅。是苦滅道。及廣說十二因緣法。無明緣行。行緣識。識緣名色。名色緣六入。六入

緣觸。觸緣受。受緣愛。愛緣取。取緣有。有緣生。生緣老死憂悲苦惱。若無明滅。則老死憂悲苦惱滅。佛於天人大眾之中說是法時。六百萬億那由他人。以不受一切法故。而於諸漏心得解脫。皆得深妙禪定。三明六通。具八解脫。第二第三第四說法時。千萬億恆河沙那由他等眾生。亦以不受一切法故。而於諸漏心得解脫。從是已後。諸聲聞眾。無量無邊。不可稱數。爾時十六王子。皆以童子出家而為沙彌。諸根通利。智慧明了。已曾供養百千萬億諸佛。淨修梵行。求阿耨多羅三藐三菩提。俱白佛言。世尊。是諸無量千萬億大德聲聞緣覺。皆已成就。世尊亦當為我等說阿耨多羅三藐三菩提法。我等聞已。皆共修學。世尊。我等志願如來知見。深心所念。佛自證知。爾時轉輪聖王。所將人眾。見十六王子出家。亦求出家。王即聽許。爾時彼佛受沙彌請。過二萬劫已。乃於四眾之中。以一乘妙音隨一乘機宜無量差別。說是大乘經名妙法蓮華。教菩薩法。佛所護念。說是經已。十六沙彌為阿耨多羅三藐三菩提故。皆共受持諷誦通利。聲聞眾中。亦有信解。其餘眾生千萬億種。皆生疑惑。佛說是經。於八千劫未曾休廢。說此經已。即入靜室。住於禪定八萬四

千劫。是時十六菩薩沙彌。知佛入室寂然禪定。各升法座。亦於八萬四千劫。以一切妙音為四部衆。隨機廣說分別妙法華經。一一皆度六百萬億那由他恆河沙等衆生。示教利喜。令發阿耨多羅三藐三菩提心。大通智勝佛過八萬四千劫已。從三昧起。往詣法座安詳而坐。普告大衆。是十六菩薩沙彌。甚為希有。諸根通利。智慧明了。已曾供養無量千萬億無數諸佛。於諸佛所。常修梵行。受持佛智。開示衆生。令入其中。汝等皆當數數親近而供養之。所以者何。若聲聞辟支佛及諸菩薩。能信是十六菩薩所說經法。受持不毀者。是人皆當得阿耨多羅三藐三菩提如來之慧。佛告諸比丘。是十六菩薩。常樂說是妙法蓮華經。一一菩薩。所化六百萬億那由他恆河沙等衆生。世世所生與菩薩俱。從其聞法。悉皆信解。以此因緣。得值四萬億諸佛世尊。於今猶不盡。諸比丘。我今語汝。彼佛十六沙彌菩薩。今皆得阿耨多羅三藐三菩提。於八方國土現在說法。有無量百千萬億菩薩聲聞以為眷屬。其二沙彌。東方作佛。一名阿閼。在歡喜國。二名須彌頂。東南方二佛。一名師子音。二名師子相。南方二佛。一名虛空住。二名常滅。西南方二佛。一名帝相。二名梵相。西方

二佛。一名阿彌陀。二名度一切世間苦惱。西北方二佛。一名多摩羅跋栴檀香神通。二名須彌相。北方二佛。一名雲自在。二名雲自在王。東北方佛。名壞一切世間怖畏。第十六我釋迦牟尼佛於娑婆國土。成阿耨多羅三藐三菩提。諸比丘。我等為沙彌時。各各教化無量百千萬億恆河沙等衆生。從我聞法。為阿耨多羅三藐三菩提。我常教化阿耨多羅三藐三菩提。因懈怠忘卻。我以方便引導令離貪著。此諸衆生。於今有住聲聞地者。是諸人等。應以是法漸入佛道。所以者何。如來智慧。難信難解。爾時所化無量恆河沙等衆生者。汝等諸比丘。及我滅度後。未來世中三乘弟子等是。我滅度後。復有弟子不聞是經。不知不覺一乘菩薩所行。自於所得功德。生滅度想。當入涅槃。我於餘國作佛。更有異名。是人雖生滅度之想。入於涅槃。而於彼土。得聞是經。求佛智慧。唯以佛乘而得滅度。更無餘乘。除諸如來方便說法。諸比丘。若如來自知涅槃時到。衆又清淨。信解堅固。了達空法。深入禪定。便集諸菩薩及聲聞衆。為說是經。世間無有二乘而得滅度。唯一佛乘得滅度耳。比丘當知。如來方便。深入衆生之性。知其志樂小法。深著五欲。為是等故。說於涅槃。

是人若聞。則便信受。我今復以譬喻以明此義。譬如五百由旬險難惡道。曠絕無人怖畏之處。若有多衆。欲過此道至珍寶處。有一導師聰慧明達。善知險道通塞之相。將導衆人欲過此難。所將人衆。已過三百由旬。中路欲退。白導師言。我等疲極。而復怖畏。前路猶遠。不能復進。今欲退還。導師多諸方便。而作是念。此等可愍。云何捨大珍寶而欲退還。作是念已。以方便力。於險道中。化作一城。告衆人言。汝等勿怖。莫得退還。今此大城。可於中止。隨意所作。若入是城。快得安隱。若欲前至寶所。亦可得去。是時疲極之衆。即入化城心大歡喜。歎未曾有。我等今者免斯惡道。快得安隱。於是衆人前入化城。不久生已度想。生安隱想。不欲前進寶所。爾時導師。知此人衆既得止息。無復疲倦。即滅化城。語衆人言。汝等去來。寶處在近。向者大城。我所化作為止息耳。諸比丘。如來亦復如是。昔為汝等作大導師。知諸生死煩惱惡道險難長遠。應去應度。若衆生但聞一佛乘者。則不欲見佛。不欲親近。便作是念。佛道長遠。久受勤苦乃可得成。佛知是心怯弱下劣。以方便力。而於中道為止息故。說三涅槃。若衆生住於三地。如來爾時即便為說。汝等所作

未辦。汝昔所住地。近於佛慧。當觀察籌量今日所得涅槃。非真實也。但是如來方便之力。隱一佛乘分別說三，如彼導師為止息故。化作大城。既知息已。而告之言。寶處在近。此城非實。我化作耳。

大通智勝佛	十劫坐道場	佛法不現前	不得成佛道
諸天神龍王	阿修羅衆等	常雨於天華	以供養彼佛
諸天擊天鼓	并作衆伎樂	過十小劫已	乃得成佛道
諸天及世人	心皆懷踴躍	彼佛十六子	皆與其眷屬
千萬億圍繞	俱行至佛所	頭面禮佛足	而請轉法輪
聖師子法雨	充我及一切	世尊甚難值	久遠時一現
為覺悟羣生	震動於一切	東方諸世界	五百萬億國
梵宮殿光曜	昔所未曾有	諸梵見此相	尋來至佛所
散華以供養	并奉上宮殿	請佛轉法輪	以偈而讚歎
三方及四維	上下亦復爾	無量慧世尊	受彼衆人請
為宣種種法	四諦十二緣	無明至老死	皆從因緣有
如是衆過患	汝等應當知	宣暢是法時	六百萬億姪
得盡諸苦際	皆成阿羅漢	第二三四時	千萬恆沙衆
於諸法不受	亦得阿羅漢	從是後聲聞	其數無有量

萬億劫算數	不能得其邊	時十六王子	出家作沙彌
皆共請彼佛	演說大乘法	我等及營從	皆當成佛道
願得如世尊	慧眼第一淨	佛知童子心	宿世之所行
隱於佛知見	不為說一乘	對諸菩薩衆	勤求佛道者
以無量因緣	種種諸譬喻	說六波羅密	及諸神通事
大通智勝佛	經過二萬劫	然後開方便	唯一無餘乘
分別真實法	菩薩所行道	說是法華經	如恒河沙偈
彼佛說經已	靜室入禪定	一心一處坐	八萬四千劫
是諸沙彌等	知佛禪未出	為無量億衆	未解一乘法
墮於疑惑者	說佛無上慧	各各坐法座	說是大乘經
於佛宴寂後	宣揚助法化	一一沙彌等	所度諸衆生
有六百萬億	恒河沙等衆	彼佛滅度後	是諸聞法者
在在諸佛土	常與師俱生	是十六沙彌	具足行佛道
今現在八方	各得成正覺	爾時聞法者	各在諸佛所
其有住聲聞	漸教以佛道	我在十六數	曾亦為汝說
因汝懈怠故	悉忘所行道	是故以方便	引汝趣佛慧
以是本因緣	今說法華經	令汝入佛道	慎勿懷驚懼
譬如險惡道	迴絕無人迹	曠野崇峻峯	而復多惡獸

又復無水草	人所怖畏處	無數千萬衆	欲過此險道
其路甚曠遠	經五百由旬	時有一導師	強識有智慧
明了心決定	在險濟衆難	衆人皆疲倦	而白導師言
我等今頓乏	於此欲退還	導師作是念	此輩甚可愍
如何欲退還	而失大珍寶	尋時思方便	當以神通力
化作大城郭	莊嚴諸舍宅	周帀有園林	渠流及浴池
重門高樓閣	男女皆充滿	既作是化已	慰衆言勿懼
汝等入此城	各可隨所樂	諸人既入城	心皆大歡喜
貪著不欲捨	皆生安隱想	自謂已得度	不願至寶所
導師知息已	毀去化城境	集衆而告言	汝等當前進
發心往寶所	此是化城耳	我見汝疲極	中路欲退還
故以神通力	權化作此城	汝今勤精進	當共至寶所
我亦復如是	為一切導師	見諸求道者	中路而懈廢
不能度生死	煩惱諸險道	故以方便力	為息說涅槃
言汝等苦滅	所作皆已辦	既知到涅槃	皆得阿羅漢
爾乃集大衆	為說真實法	諸佛方便力	分別說三乘
唯有一佛乘	方便故說三	今為汝說實	汝所得非滅
為佛一切智	當發大精進	汝證一切智	解脫等佛法

具足諸相好 乃是真實滅 諸佛大導師 為息說涅槃
既知是息已 引入於佛慧